

বাংলাদেশ



গেজেট

অতিরিক্ত সংখ্যা
কর্তৃপক্ষ কর্তৃক প্রকাশিত

মঙ্গলবার, মে ৩০, ২০০৬

গণপ্রজাতন্ত্রী বাংলাদেশ সরকার
স্বাস্থ্য ও পরিবার কল্যাণ মন্ত্রণালয়

প্রজ্ঞাপন

তারিখ, ১৫ জ্যৈষ্ঠ ১৪১৩/২৯ মে ২০০৬

এস, আর, ও নং ৯৮-আইন/২০০৬।—ধূমপান ও তামাকজাত দ্রব্য ব্যবহার (নিয়ন্ত্রণ) আইন, ২০০৫ (২০০৫ সনের ১১নং আইন) এর ধারা ১৬তে প্রদত্ত ক্ষমতাবলে সরকার নিম্নরূপ বিধিমালা প্রণয়ন করিল, যথাঃ—

১। স্বক্ষিপ্ত শিরোনাম।—এই বিধিমালা ধূমপান ও তামাকজাত দ্রব্য ব্যবহার (নিয়ন্ত্রণ) বিধিমালা, ২০০৬ নামে অভিহিত হইবে।

২। সংজ্ঞা।—বিষয় বা প্রসঙ্গের পরিপন্থী কোন কিছু না থাকিলে, এই বিধিমালায় “আইন” অর্থ ধূমপান ও তামাকজাত দ্রব্য ব্যবহার (নিয়ন্ত্রণ) আইন, ২০০৫ (২০০৫ সনের ১১নং আইন)।

৩। দোকানদার বা ব্যবসায়ী কর্তৃক তামাকজাত দ্রব্য বিতরণ বা সরবরাহ সংক্রান্ত বিধান।—(১) আইনের ধারা ৫ এর উপ-ধারা (১) এর দফা (ঘ) এর উদ্দেশ্য পূরণকল্পে, তামাকজাত দ্রব্য বিক্রয় করে এমন কোন দোকানদার বা ব্যবসায়ী শুধুমাত্র তামাকজাত দ্রব্য ক্রেতার কাছে লিফলেট, হ্যান্ডবিল বা দলিল বিতরণ বা সরবরাহের ক্ষেত্রে উপ-বিধি (২) এর শর্তসমূহ প্রতিপালন ব্যতীত অন্য যে কোন ধরণের প্রত্যক্ষ ও পরোক্ষভাবে তামাকজাত দ্রব্যের বিজ্ঞাপন প্রচারণা বা প্রদর্শন করিতে পারিবে না।

(২) উপ-বিধি (১) এ উল্লিখিত লিফলেট, হ্যান্ডবিল বা দলিল বিতরণ বা সরবরাহের ক্ষেত্রে নিম্নবর্ণিত শর্তসমূহ প্রযোজ্য হইবে, যথাঃ—

(ক) উহার আকার অনধি $5\frac{1}{2}$ (সাড়ে পাঁচ) ইঞ্চি \times $7\frac{1}{2}$ (সাড়ে আট) ইঞ্চি হইতে হইবে; এবং

(খ) উহাতে আইনের ধারা ১০ এর উপ-ধারা (১) এ উল্লিখিত সতর্কবাণী স্পষ্টতঃ দৃশ্যমানভাবে বিধি ৭ এর অধীন নির্ধারিত মাপে ও সাদা-কালোয় মুদ্রণ করিতে হইবে।

(২৩১১)

মূল্য : টাকা ৪.০০

৪। ধূমপান এলাকা নির্দিষ্টকরণ, ইত্যাদি।—(১) নিম্নবর্ণিত পাবলিক প্রেস ও পাবলিক পরিবহনে ধূমপানের জন্য কোন স্থান চিহ্নিত বা নির্দিষ্ট করা যাইবে না, যথা ঃ—

- (ক) শিশুদের প্রি-স্কুল বা কেয়ার সেন্টার, প্রাইমারী স্কুল, হাই স্কুল বা হাই স্কুল ছাত্রদের ছাত্রবাস;
- (খ) শিক্ষা বা প্রশিক্ষণ প্রদান করা হয় এমন কক্ষ বা স্থান;
- (গ) সকল মাতৃসদন, ক্লিনিক বা হাসপাতাল ভবন;
- (ঘ) খেলাধুলা ও অনুশীলনের জন্য নির্ধারিত আচ্ছাদিত স্থান; এবং
- (ঙ) এক কামরাবিশিষ্ট পাবলিক পরিবহন।

(২) পাবলিক পরিবহনে আরোহণের নিমিত্ত অপেক্ষমাণ যাত্রীদের জন্য নির্ধারিত সারি বা স্থান পাবলিক প্রেস গণ্যে উক্ত সারি বা স্থানে ধূমপান করা যাইবে না।

(৩) পাবলিক প্রেস কোন ভবন হইবার ক্ষেত্রে, উক্ত ভবনের একাধিক কক্ষের একটি কক্ষ ধূমপানের জন্য নির্দিষ্ট করা যাইতে পারে, তবে কক্ষটি অবশ্যই ধূমপানমুক্ত এলাকা হইতে ছোট হইতে হইবে।

(৪) পাবলিক পরিবহন রেলগাড়ি, স্টিমার, লঞ্চ, ফেরী হইবার ক্ষেত্রে, ধূমপানের জন্য আলাদা একটি স্থান বা কক্ষ নির্দিষ্ট করা যাইতে পারে, তবে—

- (ক) উক্ত স্থান বা কক্ষটি সংশ্লিষ্ট পাবলিক পরিবহনের সর্বশেষ বা পিছনে হইতে হইবে; এবং
- (খ) উক্ত স্থান বা কক্ষটি কোনক্রমেই যাত্রী ধারণের প্রধান কক্ষে নির্দিষ্ট করা যাইবে না।

(৫) কোন পাবলিক প্রেসে বা পাবলিক পরিবহনে ধূমপানের জন্য কোন স্থান বা কক্ষ চিহ্নিত বা নির্দিষ্ট করা হইলে উক্ত চিহ্নিত বা নির্দিষ্ট স্থানের মধ্য দিয়া যাহাতে কোন অধূমপায়ীর যাতায়াত করিতে না হয় সেইজন্য উক্ত পাবলিক প্রেস বা পরিবহনের মালিক, তত্ত্বাবধায়ক বা নিয়ন্ত্রণকারী ব্যক্তি বা ব্যবস্থাপককে উহা নিশ্চিত করাসহ উক্ত স্থান বা কক্ষ হইতে ধূমপায়ীর ধোঁয়া যাহাতে ধূমপানমুক্ত কোন কক্ষ বা স্থানে যাইতে না পারে উহা নিশ্চিত করিতে হইবে।

৫। ধূমপান এলাকার বর্ণনা।—আইনের ধারা ৭ এর উদ্দেশ্য পূরণকল্পে, কোন পাবলিক প্রেস বা পাবলিক পরিবহনে ধূমপানের জন্য কোন স্থান চিহ্নিত বা নির্দিষ্টকরণের ক্ষেত্রে, নিম্নবর্ণিত শর্তাদি প্রতিপালন করিতে হইবে, যথা ঃ—

- (ক) ধূমপানের এলাকা অবশ্যই ধূমপানমুক্ত এলাকা হইতে পৃথক বা, প্রয়োজনবোধে, আচ্ছাদিত হইতে হইবে;
- (খ) ধূমপানের স্থানের ধোঁয়া নির্গমনের জন্য পৃথক ব্যবস্থা গ্রহণক্রমে নিশ্চিত করিতে হইবে যে, উক্ত ধোঁয়া ধূমপানমুক্ত এলাকায় প্রবেশ করিতে না পারে;
- (গ) ধূমপানের স্থানে অগ্নিনির্বাপক যন্ত্রের ব্যবস্থাসহ বিডি বা সিগারেটের উচ্ছিষ্ট অংশ নিক্ষেপ বা ফেলার জন্য বালি ও পানিসহ যথাযথ পাত্রের ব্যবস্থা থাকিতে হইবে।

৬। সতর্কতামূলক নোটিশ প্রদর্শন।—আইনের ধারা ৮ এর উদ্দেশ্য পূরণকল্পে, প্রতিটি পাবলিক প্রেস বা পাবলিক পরিবহনে ধূমপানের জন্য কোন স্থান চিহ্নিত বা নির্দিষ্ট করা হইলে উক্ত স্থানে নিম্নবর্ণিত সতর্কতামূলক ব্যবস্থা গ্রহণ করিতে হইবে, যথাঃ—

- (ক) ধূমপান এলাকা হিসাবে চিহ্নিত বা নির্দিষ্ট স্থানের বাহিরে ধূমপানমুক্ত এলাকায় “ধূমপান হইতে বিরত থাকুন, ইহা শান্তিযোগ্য অপরাধ” মর্মে সতর্কতামূলক নোটিশ, আন্তর্জাতিকভাবে স্বীকৃত ধূমপানমুক্ত সাইনসহ, দৃষ্টিযোগ্য স্থানে বাংলা এবং প্রয়োজনবোধে, ইংরেজীতে প্রদর্শন করিবার ব্যবস্থা করিতে হইবে;
- (খ) পাবলিক প্রেসে সতর্কতামূলক নোটিশ বোর্ডের ন্যূনতম সাইজ হইবে ৬০ সেঃমিঃ x ৩০ সেঃমিঃ;
- (গ) পাবলিক প্রেসের প্রবেশ পথের এক পার্শ্বে উক্ত সতর্কবাণী লটকাইয়া বা সাঁটিয়া স্থাপন করিতে হইবে এবং উহার অভ্যন্তরে একাধিক স্থানে এমনভাবে সতর্কতামূলক নোটিশ প্রদর্শন করিতে হইবে যাহাতে সকলের দৃষ্টিগোচর হয়;
- (ঘ) পাবলিক পরিবহনের একাধিক দৃষ্টিগোচর স্থানে দফা (ক) এ উল্লিখিত সতর্কতামূলক নোটিশ, ধূমপানমুক্ত সাইন স্থাপনসহ, প্রদর্শন করিতে হইবে; এবং
- (ঙ) সতর্কতামূলক নোটিশের সাদা জমিনে লাল অক্ষরে অথবা কালো জমিনে হলুদ অক্ষরে ধূমপানমুক্ত সাইনসহ লিখিতে হইবে।

৭। তামাকজাত দ্রব্যের মোড়ক, প্যাকেটে স্বাস্থ্য সতর্কবাণী, মুদ্রণ, ইত্যাদি।—(১) বাংলাদেশে উৎপাদিত বা আমদানীকৃত তামাকজাত দ্রব্যের প্রতিটি প্যাকেট বা মোড়কে আইনের ধারা ১০ এর উপ-ধারা (১) এ বর্ণিত প্রতিটি সতর্কবাণী উক্ত ধারার বিধান অনুসরণক্রমে মুদ্রণ করিতে হইবে।

(২) উক্ত ধারায় বর্ণিত সতর্কবাণীসমূহের যে কোন একটি সতর্কবাণী প্যাকেট বা মোড়কের মূল প্রদর্শনী তলের উপরের উভয় পার্শ্বে স্পষ্ট বাংলা অক্ষর মুদ্রণ করিতে হইবে এবং উহার আকার প্যাকেট বা মোড়কের মোট জায়গার অন্যান্য ৩০% পরিমাণের হইতে হইবে :

তবে শর্ত থাকে যে, উৎপাদিত প্রতিটি ব্র্যান্ডের তামাকজাত দ্রব্যের প্যাকেট বা মোড়কে আইনে উল্লিখিত সতর্কবাণীসমূহ ক্রমানুসারে ছয় মাস অন্তর অন্তর পরিবর্তন করিতে হইবে।

ব্যাখ্যা।—এই বিধির উদ্দেশ্যে পূরণকল্পে, “মূল প্রদর্শনী তল” বলিতে প্যাকেট বা মোড়কের সর্ববৃহৎ আকারের ২টি তলকে বুঝাইবে।

(৩) উপ-বিধি (২) এর শর্তাংশে উল্লিখিতমতে সতর্কবাণী পরিবর্তনের সময় স্বাস্থ্য ও পরিবার কল্যাণ মন্ত্রণালয় বিশেষ আদেশ দ্বারা নির্ধারণ করিবে।

(৪) তামাকজাত দ্রব্যের প্যাকেট বা মোড়কে সতর্কবাণী “সুতনি এমজি” ফন্টের আকার অন্যান্য ১৮ পয়েন্ট এবং তামাকজাত সামগ্রীর কার্টনের গায়ে সতর্কবাণী আকার অন্যান্য ৩৬ পয়েন্ট হইতে হইবে।

(৫) সতর্কবাণী তামাকজাত দ্রব্যের মোড়ক বা প্যাকেটের মূল প্রদর্শনী তল দুইটির উপরিভাগে, বা যদি স্ট্যান্ড বা ব্যান্ডরোল মূল প্রদর্শনী তলের উপরিভাগে সংযুক্ত করা হয়, তাহা হইলে উহার নিম্নভাগে, কালো জমিনের উপর সাদা অক্ষরে বা সাদা জমিনের উপর কালো অক্ষরে মুদ্রণ করিতে হইবে।

(৬) কোন ব্যক্তি বা প্রতিষ্ঠান তামাকজাত দ্রব্যের মুদ্রিত প্যাকেট বা কার্টনের উপর এমন কোন চিহ্ন, শব্দ, রং বা ছবি ব্যবহার করিতে পারিবে না, যাহা আইনে বিধৃত সতর্কবাণীর সাথে অসঙ্গতিপূর্ণ বা বক্তব্যের পরিপন্থী হয়।

(৭) তামাকজাত দ্রব্যের মোড়ক বা প্যাকেটের গায়ে প্রদত্ত সতর্কবাণী এমনভাবে মুদ্রণ করিতে হইবে যাহাতে স্ট্যান্ড বা ব্যান্ডরোল সংযুক্তির বা অন্য কোন কারণে ঢাকিয়া না যায় উহা তামাকজাত দ্রব্য উৎপাদনকারী কর্তৃক নিশ্চিত করিতে হইবে।

(৮) সতর্কবাণী মুদ্রণ ব্যতীত কোন তামাকজাত দ্রব্য ১লা সেপ্টেম্বর ২০০৬ এর পর হইতে কোন ব্যক্তি কর্তৃক বাজারজাত করা যাইবে না।

৮। তামাকজাত দ্রব্য আমদানির ক্ষেত্রে উপাদান সম্পর্কিত তথ্য প্রদান।—তামাকজাত দ্রব্য আমদানির ক্ষেত্রে, উক্ত দ্রব্য আমদানির সময় উহার উপাদান সম্পর্কিত তথ্য স্বাস্থ্য ও পরিবার কল্যাণ মন্ত্রণালয়ে দাখিল করিতে হইবে।

৯। তামাকজাত দ্রব্য ধ্বংস বা বাজেয়াপ্তকরণ।—(১) কোন ব্যক্তি আইন এবং এই বিধিমালার কোন বিধান লংঘন করিয়া তামাকজাত দ্রব্য ত্রয় বা বিক্রয় করিবার প্রস্তাব করিলে বা যথাযথ তথ্য দাখিল না করিয়া কোন তামাকজাত দ্রব্য আমদানি করিলে কর্তৃত্বপ্রাপ্ত কর্মকর্তা আইন এবং এই বিধিমালার বিধান অনুযায়ী উক্ত তামাকজাত দ্রব্য হস্তান্তর, ধ্বংস বা বাজেয়াপ্ত করিতে পারিবেন এবং উক্ত কর্মকর্তা প্রয়োজনে আইন শৃঙ্খলা বাহিনীর সহযোগিতা গ্রহণ করিতে পারিবেন।

(২) উপ-বিধি (১) এর কর্তৃত্বপ্রাপ্ত কোন আইন শৃঙ্খলা বাহিনীর সহযোগিতা চাহিলে সংশ্লিষ্ট বাহিনী উক্ত কর্মকর্তাকে প্রয়োজনীয় সহযোগিতা প্রদান করিবে।

১০। কর্তৃত্বপ্রাপ্ত কর্মকর্তা।—আইনের ধারা ২ এর দফা (ক) এ উল্লিখিত “কর্তৃত্বপ্রাপ্ত কর্মকর্তা” অভিব্যক্তির সংজ্ঞার উদ্দেশ্য পূরণকল্পে, Railways Act, 1890 (Act IX of 1890), Juvenile Smoking Act, 1919 Ben. (Act II of 1919), Dhaka Metropolitan Police Ordinance, 1976 (Ord. No. III of 1976), Chittagong Metropolitan Police Ordinance, 1978 (Ord. No. XL VIII of 1978), Khulna Metropolitan Police Ordinance, 1985 (Ord. No. LII of 1985) এবং রাজশাহী মহানগরী পুলিশ আইন, ১৯৯২ (১৯৯২ সনের ২৩ নং আইন) এর অধীন ক্ষমতাপ্রাপ্ত পুলিশ কর্মকর্তাগণও অন্তর্ভুক্ত হইবেন।

রাষ্ট্রপতির আদেশক্রমে

মোঃ আবু বক্কর সিকদার

উপ-সচিব।

মোঃ নূর-নবী (উপ-সচিব), উপ-সচিব, বাংলাদেশ সরকারী মুদ্রণালয়, ঢাকা কর্তৃক মুদ্রিত।
মোঃ আমিন জুবেরী আলম, উপ-নিয়ন্ত্রক, বাংলাদেশ ফরম ও প্রকাশনা অফিস,
তেজগাঁও, ঢাকা কর্তৃক প্রকাশিত।